

Goibekokale

ELGETA / Barikua / 2005eko abenduaren 2a / 249. zenbakia

KOORDINATZAILEA: Irati Agirreazaldegi • Barrenkalea 33 BERGARA 20570 • Tel.: 943 25 05 02 • Faxa: 943 25 05 13 • Posta elektronikoa: goibekokale@goiena.com • Lege gordailua: SS475/95

Marrazki lehiaketa eta jaialdia Gabonetarako

IRATI AGIRREAZALDEGI

Abenduan sartu berri bagara ere, inguruan hasi gara Gabon giroa sumatzen. Elgetan aurten marrazki lehiaketa antolatu dute Gabonetarako eta deialdia egindda dago. Honetaz gain, iazko arrakasta ikusita aurten ere herritarren jaialdia antolatu dute hilaren 23rako.

Iaz Gabonetako zuhaitz lehiaketa egin ostean, aurtengorako marrazki lehiaketa antolatu du Udalak. Eskolako umeez parte hartu ahal izango dute; eta lanak aurkezteko epea abenduaren 16a da. Marrazkian, Gabonekin eta Olentzerorekin zerikusia duten irudiek agertu beharko dute.

Lehiaketako irabazlea zein den abenduaren 23an jakinaraziko dute; eta egun horretan, arratsaldean, marrazki guztiak ikusgai ipiniko dituzte udaletxe azpian. Olentzero ere egun horretan bertan iritsiko da Intxortatik Elgetara, 18:30ak inguruan, eta herriko umeen eskutitzak jasoko ditu.

JAIALDIA ESPALIOAN

Bestalde, iazko arrakasta ikusita aurten ere Gabonetako jaialdia



GOIENKARIA

Herritarrek izena eman behar dute Espaloian hilaren 23ko jaialdian parte hartzeko.

dia antolatu dute. Abenduaren 23an izango da hura ere, 22:30ean, Espaloian.

Herriko elkarte, talde, koadrila zein norbanakoek har dezakete parte. Horretarako, kantu bat aukeratu eta Espaloian bertan eman behar da izena. Ondoren,

egunean bertan, herritarren aurrean kantatuko dute aukeraturako abestia. Jaialdian jasotako dirua Ibilaldiari laguntzeko izango da.

Herritarrek giroa berotutakoan, dantzarako aukera izango da Gardokiren doinuekin.

ZINEMA

Abenduan lau film zineklubeko saioetan

I.A.

Abenduan sartuta ohiko zineklubeko emanaldiek jarraipena izango dute eguaztenero Espaloian. Abenduaren 7an *Tigre y dragón* abenturazko filma ikusi ahal izango da; 14an Bosnia eta Serbiako bi soldaduren istorioa kontatzen duen *En tierra de nadie* drama; Berlingo Zinemaldian Zilarrezko Hartza eskuratu zuen *Mifune* filma 21ean emango dute. Oraingo hilean zineklubeko

azken filma hilaren 28an izango da: *La estrategia del caracol* film kolonbiarra. Filmak 21:00etan hasiko dira eta sarrerak bi euro balio du; bazkideendako doan.

FAMILIARENDAKO ZINEMA

Bestalde, domekero, 17:30ean, familia giroan ikusteko filmak emango dituzte. Abenduaren 4an *101 dalmatas*; 11n *Socios y sabuesos*; eta 18an *Olentzero*. Bazkideek euro bat ordaindu behar dute sarrera, gainontzekoek bi euro.



Tigre y dragon abenturazko filmak argazki eta irudi bikainak erakutsiko ditu.

HERRITARREN HITZA / Alberto Telleria • Administrazio langilea

Ezezaguna

Hamaika aldiz egin dotsat irratiko esatari ezezagunaren abotsari arpegixa jarri; ulia; ezpanak; begixak... Ez, ez da ez nere asmua Jaingoikua paruan lagatzia, baiña egindako biharrekin gustora geratu izan naiz.

Hala ta be, sarritan esan dotsat neure buruari: *Diiios, hau dok hau aldaketia!* Aldaketak txarrerako eta onerako izaten dira, gaizki pentsaurik ez dein egon. Eta, gaiñera, nik dakitela obra perfektuak, oin arte behintzat, ez dau argirik ikusi.

Gatxa eta arrarua izaten da egunero goixian despertadorak

jo, eguna joan eta eguna etorri abots bardina entzun eta ez jakitzia zein dagan berbetan. Izena bai, badakizu; baiña ez daukazu izen horren atzian daguearen itxurien barririk.

Xabier Mendiguren Elizegik dio (*Eibar.org/blogak/mendiguren*) lillurak beti izaten dabela ezjakintasun ikutu bat; eta lilluramendua sortzeko biharrezkua dala misterixua: erdixa sumatu, eta beste erdixa



“Obra perfektuak oin arte ez dau argirik ikusi”

gure buruak amestia.

Ezjakintasuna, misterixua, horrek konponentiok bada-kaz nere biharrek, baina ez dot uste lilluramendua danik. Akaso morbua, jakinguria ala gurekin hainbeste berba egitten dabenari derrigorrez itxura eta izaera emon biharra?

Ez pentsau holako tallar imaginarixuan bihargin bakarra naizenik. Nere aldamenekuei galdetu eta

langintza bardinian jardundakua dira: *Ez najuan uste holako itxuria eukanik; zaharragua emoten jok; horrek jakak pelajia.*

Holakoxiak izaten dira entzuten diren komentariuak irratiko pertsonaia baten erretratua edo imaginak, nun edo nun urtetzen dabenian. Eta gaiñera, neuk egitten doten moduan, aldemenekuek be esker onekuek izaten dira, Euskadi Irratiko esatarixen erretratuak prentsan izen eta guzti agertzen direnien.

Eta zuk, irakurle, ez dozu biharrik egin tallar horretan ebentual moduan sikera?

LABUR

Gaur Bide Eginez prozesuaren bigarren batzarra

Lehen batzarraren ostean, Batasunaren Bide Eginez eztabaida prozesuak bigarren pausoa emango du Elgetan. Gaur, barikua, bigarren batzarra egingo dute, eta aztertuko dute nolako Herritar Batasuna eraiki nahi duten aurrerantzean. Bilera 20:00etan izango da, liburutegian. Batasunak herritarrei bileran parte hartzeko gonbita egin nahi die; batik bat aurreko batzarrean izan ez eta gaiaren gainean jardun nahi dutenei.

ELKARRIZKETA

OLAIA JIMENEZ/KUTXAREN IKASKETA AMAIERAKO SARIA JASO DU

“Motibazio eta konstantziarekin lortu ditut emaitza onak”

Pedagogia eta Psikopedagogia ikasketak egin ditu Olaia Jimenez elgetarrak. Eta ikasketak amaituta Kutxak emaitzarik onenak ateratu dituzten ikasleei ematen dien diru saria jaso du: 1.350 euro. Bere ikasketez jardun dugu.

Ikasketa amaierako saria jasota, pozik egongo zara, ezta?

Bai, oso pozik. Ez nuen espero, eta sorpresa handia izan da. Norbaitek nik egindako lana errekonozitzeak poza ematen du. Gipuzkoako campusetan hainbat karreratan espedienterik onenak ditugun ikasleok jaso dugu.

Ikasle ona izateagatik jaso duzu saria. Zein da nota onak ateratzeko sekretua?

Motibazioa eta konstantzia. Langilea izan naiz, eta horri ikasketeko gogo gehituta emaitza argia izan da, nota onak, alegia. Ikasleaz gain, karrera aurrera ateratzeko asteburuetan lan egin behar izan dut, eta hori gogorra izan da.

Lana eta ikasketak nola uztartu dituzu?

Gauza batzuk alde batera utzita. Astialdirako denborarik apenas izan dut eta nuen apurra ingurukoei eskaini diet. Konturatu naiz denbora tarte honetan ez dudala aukerarik izan beste batzuek egin ahal izan dituzten zenbait gauza egiteko.

Beti izan zara ikasle ona?

Elgetan eskolan ibili nintzeanean ikasle txintxo nintzen. Institutuan lehenengo bi urteak ongi joan ziren; gero, adinaren kontuagatik-edo, petraldu egin nintzen. Makalaldiaren ostean, UBI egin eta selektibitatea gaintu nuen; eta hura bultzada izan zen karrerari gogor eusteko. Handik aurrera ongi ibili naiz.

Orain zertan diharduzu?

Karrerako azken ikasturtean ikerketa proiektuetan diharduen irakasle talde batekin hasi nintzen, bekadun. Besteak beste, egiten dituzte ikastetxeen ebalua-



“Pedagogia umeekin lotzen da; baina gizartearekin zerikusia duten arlo guztiak du lotura”

ketak. Ikerketa pedagogiaren beste arlo bat da. Doktozetzarekin ere hasi naiz aurtan.

Zein irtenbide ematen dute zuk egindako ikasketek?

Hainbat aukera daude. Ikerketen arloaz gain, ikastetxeetan lan egitea edo unibertsitatean

irakasle moduan jardutea. Azken aukera hau oso ona da, baina ez dut besterik bazterten. Askotan pedagogia umeekin lotzen da; eta gizartearekin lotura duten arlo guztiak du zerikusia. Hezkuntza landu dugu eta heziketa ez da umeetan bakarrik gertatzen, bizitza guztian baizik.

Ikasketetan izan duzu trabarrik?

Euskaldun bezala ez dira nire eskubide guztiak bermatuak izan. Egun, zoritxarrez, ez dago karrera guztia euskaraz ikasterik; hautazko ikasgaiak, esaterako, gaztelaniaz egin ditut. Baina dena ez da traba izan. Hainbat irakaslek euren jakintza modu egokian helarazi didate, eta eredu izan ditut.

KIROLA

ESAITekin bat egin dute 11 kirolarik

I.A.

Euskal Selektzioaren Aldeko Iritzi taldeak (ESAIT) sinadurak jasotzen dihardu Euskal Herriko kirol federazio nazionalaren alde.

Herriz herri egiten ari dira sinadura bilketa, eta Elgetan ere hainbat kirolean federatutako 11 kirolarik dagoeneko sinatu dute manifestua: Mendi Federazioko bazkide Samuel Gorrotxategi, Enrike Gorrotxategi eta Jose Luis Egizabal; futboleko federatutako Josu Etxaniz, Koldo Erostar-

be, Oxel Erostarbe, Jon Irazabal, Iraitz Bolinaga eta Txomin De Vega; eta Eñaut Arantzeta eta Aitor Elkoro pilotariak.

ORAINDIK SINATZEKO AUKERA

Horren harira, gainontzeko federatuek domekara arte dute Espaloiara jo eta agiria sinatzeko.

Agiri horrek, bestek beste, zera dio: “Euskal Herria bere osotasunean ordezkatzeko duen selektzioa nahi dugu, eta horretarako, Euskal Herriko federazio nazionalak behar ditugu.

KIROLA

Kiroldegia itxita, sabaia hautsi delako

I.A.

Joan den astean egindako elurrak eta izotzak kalteak eragin ditu kirol instalazioetan. Hori dela eta, kiroldegia itxita egongo da erabiltzaileen segurtasuna bermatzeko. Bitartean, kirol saioak Herri Eskolako azken solairuan egingo dituzte.

Joan den asteko elurteek hainbat kalte eragin dituzte kiroldegian. Pilotalekuko teilatua konpontzen dihardute, eta ura gimnasioko aldera pasatu da. Horren ondorioz, gimnasioko sabaian bi plaka hautsi dira eta itoginak sortu dira.

Kiroldegian egiten diharduten lanak direla-eta erabiltzaileen segurtasuna bermatzeagatik, denboraldi baterako kiroldegia ixtea erabaki du Elgetako Udalak.


Horregaitik, joan den astelehena ezkererik itxita dago kiroldegia; beraz, gimnasioa, squash kantxa eta sauna ezingo dira erabili.

Horregaitik, gimnasia, tai-chi, aerobik, karate eta Eskola Kirolko saioak Herri Eskolako ganbaran egingo dituzte. Saioak orain arteko egun eta orduetan izango dira.

Oraindik ez dago zehaztuta etenak zenbat iraungo duen. Izan ere, lehenengo, pilotalekuaren aldeko teilatua konpondu behar dute, eta gero hasiko dira gimnasiokoarekin; eta lanak amaitu artean, gutxienez, itxita izango dela esan digute.

TARIFAK

Bestalde, kirol jardueretan izena eman dutenei jakinarazi nahi diete, urtero bezala aurtan ere tarifak igoko dituztela. Igoera KPIren arabera da: %3,5.



Pilotalekuko teilatua konpontzeko lanetan dihardute kiroldegian.



RECYDE, S.A.

Pagatza pol. ind. 20690 ELGETA, Gipuzkoa
Tel.: zentrala: 943 78 80 00. Faxa: 943 78 90 10
Posta elektronikoa: recyde@recyde.es



Enpresa Erregistratua

ER-0182/2/95

ISO 9002
QS 9000
ISO/TS 16949

Aperribay, s.l.

Marmoldegi eta granitoak

Pagatza indus. z/g.
Tel. eta faxa: 943 78 90 21

20690 ELGETA